

Buyer's Manual 101

1st Edition



د/ محمد سعودي

مقدمة

بسم الله والحمد لله والصلاة والسلام علي أشرف المرسلين وخلق الله، محمد بن عبد اللاه، النبي الأمي،
وعلي آله وصحبه وسلم. أما بعد:

عن أبي هريرة -رضي الله عنه- عن النبي -صلى الله عليه وسلم- قال: (إذا مات الإنسان انقطع عمله إلا من
ثلاث؛ صدقةٍ جاريةٍ، أو علمٍ يُنتفعُ به، أو ولدٍ صالحٍ يدعُو له)

فאלلهم اجعل هذا العمل علماً ينتفع به

◆ في هذا الكتاب حصيلة أعوام من الخبرة وبعث أشهر من البحث والدراسة وعدة أسابيع من الإعداد حتى يخرج هذا العمل إلي
النور ويصح بين يديك "أيها القارئ" بهذا الشكل والتنسيق. هذا الكتاب هو مدخل لفهم عالم الأجهزة الالكترونية التي لا غني
عنها اليوم والتي لا بد أنك تستخدم علي الأقل واحداً منها. هنا نبدأ بالتعرف علي مكونات اغلب الأجهزة الشائعة ومن ثم نتعلم
آلية عمل كل منها وكيف تتكامل مع بعضها البعض حتى يقوم الجهاز بعمله بشكل متناسق. ثم نمر علي الموصفات الخاصة بكل
مكون ومن ثم نقوم بتطبيق عملي عليها وفي النهاية يكون هناك مراجعة لما تم ذكره.

◆ اللغة المستخدمة هنا هي اللغة العربية (تحديداً اللهجة المصرية) لتسهيل فهم المادة العلمية دون الشعور بالملل من النظام
التقليدي للكتابة. والكتاب نظامه كالتالي:

- يوجد في اول الكتاب فهرس لتسهيل الوصول للموضوع المطلوب بسرعة.
- يحتوي الكتاب علي عدد من الفصول كل منها يتناول مكوناً من المكونات، ويتبعه ملحق للتركيز علي بعض النقاط واطافة
معلومات تفيد الفهم وقليل من الأسئلة لمراجعة الفهم.
- يلي ذلك أرشيف يحتوي علي أشهر الأجهزة التي تم اطلاقها من عدد من الشركات ومراجعة سريعة لمواصفاتها حتى تكون
مرجعاً إذا احتجت إليه.

ملخص الكتاب

الفصل الأول: البداية، حيث يقدم الكتاب فكرة تشبيه الأجهزة الإلكترونية بالكائنات الحية، فالمعالج يمثل العقل، والذاكرة تمثل الوعي، والكاميرا والمايك يمثلان الحواس، والشاشة والسماعة تمثلان وسيلة الإخراج. الهدف من هذا التشبيه أن يفهم القارئ كيف تعمل المكونات في تكامل تام ليؤدي الجهاز وظائفه. يشجع الكتاب القارئ على التفكير العلمي دون تعقيد المصطلحات، ليتمكن من التعامل مع الأجهزة الذكية بوعي وفهم.

في الفصل الثاني: المعالج CPU. يتم تناول مبدأ عمل المعالج باعتباره "العقل" الذي ينفذ الأوامر ويعالج البيانات. يتكون من وحدة التحكم CU، ووحدة الحساب والمنطق ALU، ومخازن مؤقتة Registers يُقاس أداؤه بعدد الدورات في الثانية GHz، وكل دورة تمر بمراحل Fetch، Decode، Execute، Store. تختلف المعالجات حسب عدد الأنوية وسرعة التردد وتقنية التصنيع بالنانومتر، وكلما صغرت الدقة زادت الكفاءة. ثم يستعرض الكاتب معالجات الشركات الكبرى Intel: بعائلاتها Core i3 إلى i9، AMD بعائلة Ryzen، Apple بمعالجاتها Bionic، و Qualcomm و MediaTek في الهواتف. كما يوضح كيفية مقارنة الأداء عبر مواقع مثل AnTuTu و Geek bench.

أما الفصل الثالث: كارت الشاشة GPU، فيشرح دوره كـ "مخيلة الجهاز" المتخصصة في معالجة الرسومات. يحتوي على وحدات مثل GCP لإدارة الأوامر الرسومية، و Shader Cores لمعالجة الألوان، و TMUs و ROPs لتكوين الصورة النهائية، وذاكرة VRAM لتخزين البيانات مؤقتاً. يميز الكاتب بين الفئات MX: للاستخدام البسيط، GTX للأداء المتوسط، RTX للفئة العليا، و Quadro للاستخدام الاحترافي. كما يناقش أهمية التبريد وتنظيم الطاقة داخل الكارت لتجنب ارتفاع الحرارة، ويشير إلى أن الأداء يقاس بعدد الأنوية وسرعة الذاكرة ونوعها DDR6 واتساع مسار النقل Bus Width.

في الفصل الرابع: التخزين، يفرق المؤلف بين نوعين من الذاكرة: الذاكرة المؤقتة RAM التي تُستخدم أثناء تشغيل الجهاز وتُفْرغ عند الإيقاف، وتتراوح سعتها بين 4 و 32 جيجا حسب الاستخدام. وكلما زادت سرعة الـ MHz تحسّن الأداء. أما الذاكرة الدائمة فهي الأقراص الصلبة، وتنقسم إلى HDD الميكانيكي البطيء، و SSD الإلكتروني الأسرع، بأنواعه SATA و NVMe. كما يوضح أهمية اختيار سعة مناسبة ومراعاة التقنيات الحديثة في حماية البيانات.

في الفصل الخامس: الكاميرا، يتناول المكونات الأساسية: العدسة، والمستشعر Sensor ، وفتحة العدسة، والفلش، ومعالجة الصورة. يقيس الأداء بعدد الميجابيكسل وحجم المستشعر، فكلما كان المستشعر أكبر زادت جودة الصورة. كما يشرح أن العين البشرية أكثر حساسية للون الأخضر، ما يفسر تصميم الحساسات بثلاث طبقات للألوان. يوضح الفروق بين الكاميرات العادية والـ Ultra-Wide، والتصوير البورتريه والماكرو والليبي، ويفسر أن قوة الكاميرا ليست بعدد البيكسلات فقط، بل بمعالجة الصور والاستقرار البصري. OIS/EIS.

ثم يأتي الفصل السادس: الشاشة، وفيه توضيح لأنواع الشاشات وتقنياتها.

الشاشات LCD و IPS تعتمد على إضاءة خلفية وتتميز بدقة الألوان، بينما OLED و AMOLED تحتوي على إضاءة ذاتية لكل بيكسل مما يعطي تبايناً أعلى. التقنية الحديثة LTPO تقلل استهلاك الطاقة بتغيير معدل التحديث ديناميكياً. تُقاس جودة العرض بعدد البيكسلات PPI والدقة HD ، FHD ، 4K,QHD ومعدل التحديث Hz. يربط المؤلف بين التقنية والراحة البصرية مؤكداً أن الشاشة المثالية هي التي توازن بين السطوع، الألوان، وتوفير البطارية.

أما الفصل السابع: البطارية والشحن فيتناول ساعات البطاريات التي تتراوح عادة بين 3000 و 10000 ملي أمبير، مع تكنولوجيا الشحن السريع التي تبدأ من 10 حتى 100 واط. يشرح الفرق بين منافذ Type-A و Type-C و Micro-USB و Lightning. ويوضح أن Type-C هو الأحدث لدعمه للشحن ونقل البيانات والفيديو معاً. يستعرض تقنيات الشحن السريع مثل Quick Charge و Super VOOC، والشحن اللاسلكي والعكسي. كما يوصي بشركات إكسسوارات موثوقة مثل Anker و Joyroom و Oramio، ويحذر من الأنواع الرديئة التي تضر البطارية.

يأتي الفصل الثامن: الحساسات Sensors، ليوضح أهميتها في جعل الأجهزة "ذكية". فمستشعر الضوء يتحكم في سطوع الشاشة، ومستشعر التقارب يغلق الشاشة أثناء المكالمات، والجيروسكوب والتسارع يحددان الاتجاه والحركة، والمغناطيسي يعمل كيوصل رقمية، ومستشعر الضغط الجوي يستخدم لتحديد الارتفاع، ومستشعر البصمة يعمل ضوئياً أو فوق صوتياً. هذه الحساسات هي التي تجعل الهاتف يتفاعل مع المستخدم بسلاسة ودقة.

في الفصل التاسع: المداخل Ports ، يعرض الكتاب منافذ الاتصال المختلفة، مثل USB بأنواعه A و C و Lightning، من Apple، بالإضافة إلى HDMI و VGA لنقل الصورة، و Audio Jack للصوت. ويوضح وظائف الوصلات المختلفة مثل USB

to 3.5mm و كابلات OTG لتحويل المنافذ. يشرح أن Type-C يتميز بكونه متماثلاً وسريعاً في الشحن ونقل البيانات، كما أن HDMI يدعم نقل الصوت والفيديو في كابل واحد. وينصح باختيار ملحقات أصلية لتفادي مشاكل الإشارة أو التلف.

يتناول الفصل العاشر: الشبكات آليات الاتصال اللاسلكي.

يشرح أنواع الـ Wi-Fi حتى الإصدار السادس Wi-Fi 6 الذي يتميز بسرعة نقل عالية وزمن استجابة منخفض. كما يستعرض تطور تقنيات Bluetooth حتى الجيل الخامس، و NFC لنقل البيانات والدفع الإلكتروني، إلى جانب شبكات الاتصالات من 3G إلى 5G التي توفر سرعة وأداء أفضل في الألعاب والبث المباشر. يشير إلى أن قوة الإشارة تعتمد على جودة الهوائي والخامات المحيطة.

في الفصل الحادى عشر: أنظمة التشغيل، يناقش الكاتب الأنظمة الأساسية:

Android: مفتوح المصدر من Google، مرن وقابل للتخصيص، وتدعمه شركات كثيرة.

iOS: نظام Apple المغلق، يتميز بالأمان وسلاسة الاستخدام وانتظام التحديثات لكنه محدود وغالي.

Windows: لأجهزة الحواسيب، يجمع بين الواجهة الرسومية وسهولة التعامل.

في الفصل الثاني عشر: الخامات والتوصيلات، يتناول الكتاب المواد التي تُصنع منها الأجهزة، موضحاً أن البلاستيك خفيف

ورخيص لكنه أقل فخامة، والألومنيوم قوى وخفيف وموصل للحرارة، والزجاج أبقى لكنه قابل للكسر، والسيراميك والتيتانيوم يمنحان مظهراً فاخراً وصلابة عالية، بينما الجلد الصناعي يضيف لمسة جمالية مميزة. ثم يشرح أهمية الإكسسوارات مثل الكابلات، والسماعات السلكية واللاسلكية، ونصائح لاختيار الجراب الجيد الذى يمتص الصدمات وتجنب الأنواع الرديئة.


يُختتم الكتاب بـ الفصل الأخير: الأرشيف، وهو ملحق يضم قائمة بأحدث الموبايلات التي أصدرتها أشهر عشر شركات في عام

2025، مع ملخص لمواصفاتها الفنية كمرجع للمقارنة السنوية. يشجع المؤلف القارئ على استخدام المعلومات السابقة لتقييم الأجهزة القادمة بنفسه، دون الاعتماد على التسويق التجارى. في النهاية، يربط الكتاب بين المعرفة التقنية والممارسة العملية، فيقدم دليلاً متكاملًا لفهم الإلكترونيات الحديثة من منظور عملي مبسط. ويؤكد على أهمية الاستخدام السليم للتكنولوجيا، لا كمتجرد ترف، بل كوسيلة لرفع الوعي وتسهيل الحياة. بهذا الأسلوب الممتع والمباشر، يصبح "Buyer's Manual 101" مرجعاً عربياً فريداً لكل من يريد فهم عالم الأجهزة الذكية من الداخل والخارج، بأسلوب واضح، علمي، ومناسب لكل المستويات.

الفهرس

8	الفصل الأول: البداية
11	الفصل الثاني: المعالج
31	الفصل الثالث: كارت الشاشة
46	الفصل الرابع: التخزين
59	الفصل الخامس: الكاميرا
71	الفصل السادس: الشاشة
82	الفصل السابع: الشحن والبطارية
97	الفصل الثامن: الحساسات
119	الفصل التاسع: المداخل
138	الفصل العاشر: الشبكات
149	الفصل الحادى عشر: أنظمة التشغيل
167	الفصل الثاني عشر: الحامات والتوصيلات
177	إجابة الأسئلة:
183	الفصل الثاني عشر: أرشيف الموبايلات

الفصل الأول: البداية



طيب نسينا بقا من الرسميات دلوقتي وتكلم شوية عن الكتاب. ايه الفكرة من الكتاب؟ بص هو يعني انا كنت ناوى اعمله كورس الأول بس حسيت انه لو خليت كتاب هيبقى ليه قيمة اكبر واسهل فالانتشار. وطبعا اخذت اللهجة المصرية للكتابة علشان يعني الواحد لما يلاقى الحاجة فيها رسميات بيبدأ ينفر منها ويستقلها ويحس انه بيعمل حاجة مملّة زى الدراسة بالنظام التقليدى. لكن كده هتחס ان واحد واقف قدامك بيتكلم معاك بشكل مبسط من غير تعقيدات المصطلحات وكل الكلام ده فكده يكون تلقى المعلومة بالنسباليك مقبول وتجنب صعوبة الفهم او فهم جزء بشكل مش صحيح.

حابب بس ابنه علي نقطة معينة، شوف دلوقتي كل حاجة فالدنيا ممكن يتم استخدامها بشكل صحيح ومفيد ويمكن يتم استخدامها بشكل خاطئ. هديني فالكتاب ده هو الاستخدام السليم وده سواء دينيا او دنيويا. الأجهزة مهمة فحياتنا وبتخدمنا وتسهل علينا حاجات كتير ويمكن تبقا مصدر رزق وفائدة وتعلم. ويمكن برضه يتم استخدامها بشكل سيء يضرك وكمان يحملك ذنوب. يعني متزوحش تاخذ ترشيحاتي وتحبب جهاز وتقعده تشغله ألعاب أو أفلام ومسلسلات او حاجة كده وكده وانت فاهم بقا. فبعض الموسيقى حرام، وكذلك المشاهد اللي مش مطبوطة فالأفلام وغيره او حتى علي يوتيوب وغيره.

أنا مش هقعده أفضل فالملفوظ وكل واحد أكيد عارف الصح من الغلط وكل واحد هيتحاسب وحده. وطبعا بربأ ذمّي من أى حد يستخدم اللي هيتعلمه هنا ف حاجة تجيب عليها ذنب أو تضره فدينته وتضيع عليه وقته أو تشغله عن شغل أو بيت أو مذاكرة وكل ده. أنت هنا بتعرف حاجة تفيدك ف شغل أو دراسة أو المهام اليومية فلو سمحت يعني لو هتستخدم الكتاب ده غلط فأقفله ومتشيلناش إحنا الإثنين ذنب وإستعوض ربنا ف تمنه وإديه لحد فعلا ممكن يستفيد منه. أنا كده بلغتك وأخليت مسؤوليتي وأنت بقا حر بعد كده.

ندخل بقا فالكتاب.... بص ي معلم، الاول هنتعرف علي اجزاء الاجهزة الذكية وده يشمل الموبايلات واللابات واللي زيهم. هنعرف كل جزء ايه فايدته وايه مكوناته وكل مكون من مكوناته بيشتغل ازاي او ايه فايدته. بعدها نجمع كل المعلومات دى بحيث انه نبقا عندنا فكرة عن امكانيات كل مكون من مكونات الجهاز عموما وايه اهم المصطلحات والارقام وغيره من الحاجات اللي هنتحتاجها لما نقرا اسم المكون ده لما نشترى جهاز جديد، ونقدر نقيم بعد كده هل يستحق السعر بتاعه ولا لا. بعد ما نخلص بقا هناخد تطبيقات عملية علشان نشوف هل الشرح اتفهم ولا محتاج تعيد اللي فات تاني

ف خيلنا نتكلم عموما عن الجهاز وخيلنا نعتبر ان الجهاز اللي معاك ده عبارة عن كائن حي وليكن مثلا إنسان. طبعا الانسان فيه أجهزة، واعضاء للإدخال، والاخراج حواس، وغيره .


ف اول حاجة موجودة فالإنسان يعتبر هيا عقل الانسان. جوا الجهاز الذكي بقا ده يقابل المعالج وهو يعتبر اهم قطعة فالجهاز كله .
بعدين عندنا كارت الشاشة وده فالإنسان ممكن نقول انه المخيلة بتاعته اللي تقدر توريه سيناريوهات وأحداث وكده.

عندنا بقا بعد كده نوعين من الذاكرة واحدة طويلة وواحدة لحظة او قصيرة زى اللي عند الانسان برضه. في بعد كده الكاميرا
ووى ممكن نعتبرها العين. واكيد السماعات هتكون هيا البوق، والمايك هو الودان

وقيس علي ده كل مكون هنا في واحد يشبهه فالإنسان بحيث انك تقدر تربط المكونات ببعضها وتفهم ازاي بتشتغل مع بعض .

لغاية هنا يعتبر المقدمة خلصت. هنبدأ بالفصل اللي جاي نتكلم بقا عن اول قطعة عندنا وهي المعالج .

الفصل الثاني: المعالج



تركيب المعالج

خليتنا نتكلم دلوقتي عن اول قطعة او مكون بنجيب سيرته لما نفكر ف اى جهاز لما نأجي نشترى الا وهي المعالج وده اعتبره مركز الجهاز او لو حببت سميه عقل الجهاز .

طبعاً التسمية دى مجتاش من فراغ ، يعني ك عقل الجهاز ف هو بيعمل كام عملية كده ورا بعض. الاول بياخد المعطيات من الحواس وهيا باقى مكونات الجهاز، بعدها بقا ى ريس يعملها العمليات المطلوبة والمعالجة (مهو معالج بقا هه) علشان يغير شكلها للشكل اللي محتاجينه، اخر خطوة بقا انه بيعت المخرجات بتاعته للأجزاء المسؤولة عن اظهارها ليك ك مستخدم علي سبيل المثال الشاشة او السماعه وغيره .

طيب فهمنا كده فاجمل مقدمة سريعة عن ايه بالظبط المعالج. ندخل بقا فالمعالج نفسه من جوا ...

شوف.. خلينا نفوس جوا المعالج كده ونعتبره مثلاً مصنع او للتقريب أكثر خلينا نقول انه عندنا شركة. حلو؟ حلو... الشركة دى اكيد ليها مدير او رئيس و ده بقا اللي منظم كل حاجة بتحصل ازاى وامنى. تمام كده عندنا المدير واكيد المدير عنده جمب المكتب اللي شغال فيه مكاتب لباقي الموظفين اصله مش هيشغل وحده يعني... وجمب المكاتب دى كلها اكيد شغالين عن مشاريع والمشاريع دى بتتخزن ف مكان يرجعوله يحطوا فيه اللي شغالين عليه وياخدوا اللي محتاجه منه ...

كده عندنا فكرة عامة عن شكل الشركة وخلينا نحدد عدد مكاتب الموظفين مثلاً ب 6 مكاتب غير مكتب المدير والارشيف او المخزن بتاع الشركة، تمام؟ يبقا كده عندنا شركة، الشركة دى فيها مكتب للمدير وجمبه المكتبة او الارشيف او المخزن، وجمب دول بقا بالتوازي 6 مكاتب للموظفين .

طيب كل مكتب من دول محتاج حد مسؤول عنه، إذا جوا كل مكتب فيه رئيس المكتب. جمب رئيس المكتب ده في اكيد شخص مسؤول عن الحسابات اكيد اصل دى شركة يعني مش اى حاجة... وطبعاً احياناً بيحتاج كل مكتب يتعامل فالسريع مع ملفات خاصة بيه فيفترض بقا انه عندنا جوا المكتب ده في دولاب كده خاص بالمكتب ده غير المكتبة بتاعته الشركة. اخر حاجة بقا علشان الصورة توضح ان كل موظف محتاج كمان ادراج فالديسك اللي شغال عليه علشان يخلص اموره بسرعة ... طبعاً صدقت ان دى اخر حاجة بجد مش كده؟ لسة كمان اخر حاجة المرة دى بجد واللي هي الفايلات اللي بتبقا علي كل ديسك ودى اكيد اصغر من الادراج والوصول ليها اسرع كمان. وطالما موظفين المكتب عندهم منها فالأولى إن مدير الشركة يكون عنده هو كمان.

حلو كده بقا نرتب الكلمتين اللي قولناهم:

عندنا شركة اعتبر مكونة لو بصيت من فوق كده من 8 اجزاء او اماكن، 2X4... اول 2 جمب بعض هو مكتب المدير وجنبه مكتبة الشركة. بعدها 6 مكاتب للموظفين معمولين 2X3 بالتوازي مع المكتبة ومكتب المدير. بين كل ال 8 اجزاء دى في زى طريقة او ممرات علشان الناس تتحرك فيها. المهم كل مكتب من الستة بتوع الموظفين في رئيس للمكتب ودولاب يشيل الورق الخاص بالمكتب وكل ديسك للموظفين بتاع المكتب فيه ادراج وعلي الديسك من فوق فيه فايل شايل الورق الاكثر اهمية واللي عليه الشغل حاليا .

تخيلتها؟ تمام (لو متخيلتهاش في صور فالمالحق متقلقش)، تعالي بقا ندى كل حاجة من دول اسمها جوا المعالج ونقول دى بتعمل ايه .

بص بقا، مكتب المدير ده هيكون هو ال "CU" الرئيسية فالمعالج ودى اختصار ل Control Unite ومعناها وحدة التحكم وباين من اسمها بتعمل ايه بس ركنر علشان دى الرئيسية بتاعت المعالج كله علشان في زيبها ف كل مكتب للموظفين بس مسؤولة بس عن المكتب بس وكل رئيس مكتب فالآخر بيصب تحت مدير الشركة .

المهم... المكتبة او الارشيف او المخزن بتاع الشركة هنسميها ال Cache وبما انه للشركة كلها ف طبيعي يكون اكبر مساحة تخزينية للشركة او المعالج بقا. وطبعا الحصول علي المعلومات منه بيكون بطيء لكنه بيكون حلو ف انه مشترك بين كل المكاتب فالشركة ، ف هنسميه 13.

طيب شغالين نقول مكاتب مكاتب. طب المكاتب دى ايه؟ بص هنسميها ال Cores او الانوية وكل معالج جواه عدد انوية غير الثاني. وطبعا كل ما يزيد يكون افضل ويدى انتاج اكثر .

جوا كل نواة بقا عندنا رئيس للنواة او المكتب ده وده هيكون ال "CU" الخاص بالمكتب زى ما اتفقنا و ده زى المدير بتاع الشركة بس اخره فالصلاحيات هو المكتب واللي شغالين فيه بس... خليتنا ناخذ الموظف الرئيسي ف كل مكتب او نواة تحت رئيس المكتب وتخليه هو المسؤول عن العمليات والحسابات وتظييط الدنيا ونسميه بقا ال "ALU" حلو؟

حلو، طيب نروح بقا للدولاب بتاع المكتب وبما انه مساحة تخزينية ف هنسميه برضه Cache بس هو اسرع من المكتبة و اصغر شوية ف هنسميه 12. وطبعاً كل ديسك من ديسكات الموظفين فيه ادراج. اكيد فهمت اللعبة... تخزين يبقا Cache بس بما انه اسرع واصغر ف هنسمي الدرج 11.

باقي اخر حاجة وهي الفايالات او السجلات اللي فوق كل ديسك ودى طبعا اسرع و اصغر تخزين ف هنسيبه زى ما هو اسمه
Registers وهنمزملة اختصارا ب **R**. وطبعا فيه زيه علي ديسك مدير الشركة كلها .

نروح لأخر تفصيلية فشكل الشركة وهي الطريقة او الممرات اللي قولتللك عليها فإفكر؟ دى هنسميها **Buses** ودى علشان تنتقل
الحاجات فيها بين مكونات المعالج وطبعا كل ما تكون اكبر او اوسع يكون النقل اسرع ...

كده خلصنا وصف الشركة ي معلم بس خيلنا نركز علي كام نقطة مهمة كده ... عندنا التخزين كذا نوع وحجم وسرعة. اللي
هم **Cache, Registers** . ال **Cache** منه 3 انواع:

L3 cache: دى الأكبر حجما و الاكثر بطأ ودى مفيش منها غير واحدة و مشتركة لكل المعالج

L2 cache: ودى اصغر فالججم و اسرع شوية ودى موجود منها فكل نواة واحدة خاصة بيها بس مش مشتركة مع باقي المعالج.

L1 cache: دى اصغر و اسرع واحدة فالكاش كله وبرضه في منها فكل نواة وخاصة بالنواة اللي هيا فيها بس مش مشتركة.

Registers: دى بقا اسرع حاجة موجودة وبرضه اصغرهم و دى في منها للمعالج كله مشتركة، وفي منه واحدة لكل نواة.

الانوية لما تكون عاوز تشتغل علي معلومة معينة بزوح تدور عليها فال**R**، لقيتها تمام ، ملقيتش تروح تدور فال **L1**، لقيتها تمام
ملقيتهاش تخش علي**L2**، لقيتها تمام ملقيتش تروح علي الكاش المشتركة اللي هي**L3**، لقيتها تمام ملقيتش يبقا بعد كده تروح علي
الرامات .

بالنسبة للممرات او المسارات في نوعين:

32-bit وده الاصغر والاقدم وحاليا بقا نادر

64-bit وده اللي شغال حاليا واكبر فالإمكانيات

الاولاني تقدر توصل فالجهاز رامات بحد اقصي **4** جيجا

انما الثاني معاك لغاية **16** الف تيرابايت رامات وطبعا ده رقم نظرى مش موجود فالواقع بس بوضلك فايده نوع الممرات ايه
وامكانياته ايه برضه ...

باقي نقطة هنتكلم عنها علشان بيقا قفلنا علي المعالج و قولنا المفيد فيه ...

الاول هي الترانزستورات ودى حاجة الكترونية. الحاجة دى لما تجيب منها كتير كده وتجمعهم مع بعض يدولك حاجة اسمها بوابة منطقية ولما تجمع البوابات مع بعض يدبلك حاجة اسمها IC ودى اعتبرها معالج صغير كده. فانتا ف حالة الشركة اعتبر انها الطوب اللي بيتبني بيه كل حيطه من حيط الاوضة ، والحيطان دى مع بعض تدبلك اوضة واحده

طبعاً كل ما قول حجم الترانزستور كل ما يكون افضل. هقولك ليه

افترض ي سيدى عندك دلوقتي مساحة 100 متر مربع وعندك بلاطات كل واحد مساحتها متر مربع واحد. كده المساحة هتشيل 100 بلاطة بس. لكن خلينا نفرض ان حجم البلاط صغر بقا ربع متر مربع. هتلاقي المساحة هتشيل 400 بلاطة بدل 100 بس طبعاً الترانزستور ده بيتقاس حجمه بالملي متر. يعني كل ما يقل حجمه يكون افضل. لانه هيكون عندى ترانزستورات اكثر ف نفس المساحة يعني مهام اكثر تتنفذ وسرعة اكر في إنجاز العمليات

اخر نقطة باقي وهي دورة المعالجة فالمعالج. خلينا كده نعرف المعالج بيعمل ايه بالضبط كل دورة معالجة، والله بص:

اول حاجة المعالج بيروح يجيب البيانات والاوامر اللي هيشغل عليها من وحدات التخزين اللي قولنا عليها، ولكن خلينا نقول من الرام. ودى اول عملية وهنسميها "Fetch" يعني عملية الجلب .

تاني نقطة بقا وانه تمام جاب اللي عاوز يشتغل عليه. محتاج بقا يفك تشفير اللي جابه ويفهم المطلوب ومكانه فين ويعمل ايه فيه والعملية دى هنسميها "Decode" ودى معناها فك التشفير .

تالت نقطة بقا ي ريس وهي انه مدير الحسابات اللي قولنا عليه "ALU" بيبدأ ينفذ العمليات دى والمهام المطلوبة ويطلع النتيجة اللي محتاجينها والعملية دى هنسميها "Excite" ودى معناها التنفيذ .

اخر نقطة بقا وهي انه المعالج بعد ما خلص كل حاجة خلاص بقا هيروح بيعت البيانات اللي طلعتها علشان تتخزن ويتم استخدامها من باقي مكونات الجهاز علي شكل صوت وصورة وبيانات متخزنة والعملية دى هنسميها "Rewrite" او "Store".

طيب نرجع لدورة المعالجة تاني، دى بقا بيحصل فيها ال 4 عمليات دول ورا بعض. المعالج بقا بيعمل الدورة دى مليارات المرات فالتانية الواحدة. رقم مهول طبعاً.

المهم وحدة قياس الدورات بتاعت المعالج دى هيا ال GHz ودى معناها المعالج بيعمل مليار دورة فالثانية. يعني لما نقول انه سرعته 2.4GHz معناها انه عمل 2 مليار و400 مليون دورة معالجة فالثانية .

طيب خرينا نعيد بقا علي كام نقطة مهمة بقا فالكلام اللي فات قبل ما نخش علي الجزء اللي بعد كده ...

فاكر الترانزستور؟ قولنا انه وحدة بناء الالكترونيات وكده وانه لما نجمع شوية مع بعض يدينا بوابة منطقية ولما نجمع كام بوابة منطقية يدينا مركب او دايرة صغيرة بنسميها "IC" ومثال لل IC هو كل مكون من مكونات المعالج زى ال "CU".

وقولنا ان كل ما يكون الترانزستور اصغر كل ما يكون افضل لانه بيوسع مساحة لعدد زيادة منه وكل ما يزيد العدد تزيد عدد العمليات اللي هتعمل وقولنا انه حجم الترانزستور بيتقاس بال nm ودى حجم المعمارية بتاعه. ف لما نقول معالج 4nm اكيد افضل من معالج 7nm.

تاني نقطة وهي نقطة ال Buses ودى هي المرات. في تفصيلة كده مقولناهاش وهي ان الكمبيوتر بيتعامل بحاجة اسمها الترميز الثنائي او ال Binary Code وده كل حاجة فيه بتكون كود مكون فقط من الارقام 0/1، الصفر معناها مفيش اشارة والواحد معناها فيه اشارة. المهم علشان بس منسرحش فالخطة دى اللغة بتاعت الكمبيوتر هي رقمين بس. ف لما يكون عندى مسار عرضه او مساحته 32 bit وكده يقدر يتعامل مع اامات مساحتها 232 يعني 4 مليار وشوية، واحنا قولنا المليار يساوى جيجا. اذا كده تستحمل 4 جيجابايت رام. انما لما يكون المر ده عرضه 64bit ده معناها انه بييشيل حوالي 16 ترليون بايت، يعني 16 مليار جيجا من الرام، يعني برضه حوالي 16 اكسابايت. طبعاً رقم نظرى يستحيل تحقيقه اصلاً بس بوريك انه بييشيل اى حجم من الرام عموماً. فلما نقول المعالج ده بنظام 32bit بيقا اخر 4 جيجا رام انما لما نقول 64bit معناها بييشيل اكثر من كده اياً كان الرقم عادى .

نراجع بقا اخر جزئية بتاعت سرعة المعالج بالجيجا هيرتز. وقولنا انه كل 1 GHz معناها المعالج عمل مليار دورة معالجة فالثانية وقولنا انه كل دورة عبارة عن 4 عمليات وهي الجلب، وفك التشفير، والتنفيذ، والتخزين .

كده بقا فهمننا بشكل عام كده ايه الدنيا فالمعالج بدون التعمق الشديد. فهمننا اللي محتاجينه بس حالياً .

التطبيق العملي

نكمل بقا الجزء الثاني من المعالج. اتكلمنا بشكل نظري عن المعالج والحاجات اللي ليها علاقة بيه. حاليا هنشوف تطبيق ده علي ارض الواقع. خلينا نتكلم علي الشركات اللي بتعمل معالجات وكده. بس خلينا نوضح نقطة. معالجات الموبايلات حاجة و موبايلات الكومبيوترات واللابات حاجة ثاني خالص. المهم :

عندنا ف شركات معالجات اللابات 3 شركات. وهما :

Apple

AMD

Intel

في شركات معالجات الموبايلات عندنا شركات تخصص معالجات فقط زي:

Qualcomm: ودي بتعمل معالجات Snapdragon

MediaTek: ودي بتعمل معالجات Dimensity و Helio

في بقا شركات بتعمل معالجات وبرضه هيا اصلا شركات موبايلات زي:

Google : Tensor -

Xiaomi : XRing O1 -

Samsung : Exynos -

Apple : Bionic -


Huawei : Kerin -

طبعاً كل معالج لسه امكانيات، وفتة، وسعر، وغيره. وبرضه ليه نظام في التسمية علشان نعرف ايه اللي معناها من الاسم بتاعه.

فبنبدأ نتعرف علي التسمية بتاعت المعالجات وباقي التفاصيل ونبدأ بمعالجات اللابات. وتحديدنا خلينا نبدأ بمعالجات Intel

بص انتل عندها كذا عيلة للمعالجات من ساعة ما اتعملت بس احنا هنركز علي اللي شغال حاليا وبعدين نبقا نتكلم علي العائلات اللي بطلت واللي مش مشهورة.

خلينا ناخذ مثال وليكن :




طيب هنا نلاحظ ان الاسم يتكون من :

- اسم الشركة: intel
- اسم العيلة: Core i5
- جيل المعالج: الجيل التاسع "9"
- رقم موديل المعالج: "900"
- فئة المعالج: "H"
- تردد المعالج: "2.4GHz"

هتسأل طبعاً عرفت منين جيل المعالج، بص الرقم اللي بعد العيلة علطول هو جيل المعالج ، ده فحالة كان الرقم مكون من 4 ارقام. ف حالة كان من 5 ارقام ف اول رقمين بعد العيلة هو جيل المعالج.

ف حالة معالجات ال AMD مش هتختلف كتير يعني هتلاقي الاسم نفس الفكرة:



- اسم الشركة: AMD
- عيلة المعالج: Ryzen 9
- جيل المعالج: الجيل السابع "7"
- موديل المعالج: "945"
- فئة المعالج: "HX"
- تردد المعالج: "2.4GHz"

طيب سين سؤال ، ماذا استفادات الأمة لما عرفنا اسم المعالج؟ والله بص هنعرف دلوقتي ايه فائدة ده كله ف تحديد امكانيات المعالج وسعره وعلشان كده هنتقسم كل حاجة 4 فئات:

- فئة اقتصادية ودى امكانياتها علي قدها وسعرها رخيص
- فئة متوسطة ودى امكانياتها افضل وسعره معقول
- فئة عليا ودى امكانياتها ممتازة وسعرها مرتفع نسبياً

- فئة الفلاجشيب ودى اقوى حاجة الشركة منزلها لغاية دلوقتي وطبعاً سعرها كلية من الاتنين اللي عندك

طيب خلينا نقسم الدنيا حسب الفئات ف كل جزء من اجزاء الاسم:

الفئة الاقتصادية:

الفئة المتوسطة:

- عائلة Core I3 و Ryzen 3

- عائلة Core I5 و Ryzen 5

- الاجيال من 1 ~ 6 ف شركة Intel

- الاجيال من 11 ~ 12 ف شركة Intel

- الاجيال من 1 ~ 2 ف شركة AMD

- الاجيال من 5 ~ 6 ف شركة AMD

الفئة العليا:

الفئة الفلاجشيب:

- عائلة Core I9 و Ryzen 9

- عائلة Core I5 و Ryzen 5

- الجيل 13 ف شركة Intel

- الاجيال من 7 ~ 10 ف شركة Intel

- الاجيال من 7 ~ 9 ف شركة AMD

- الاجيال من 3 ~ 4 ف شركة AMD

بالنسبة لرقم الموديل ف ده مش هياثر معانا بس كل ما يكون اعلي يكون افضل.

طيب باقى كده معانا فئة المعالج والتزدد. خلينا نخلص من التردد عالسريع علشان شرحناه فوق لما اتكلمنا عن سرعة المعالج. المهم اغلب المعالجات بتبقا 2.4GHZ . اعلي من كده بيبقا معالجات معينة وطبعاً مكلفة.

نرجع لفئة المعالج

بص بقا. الفئات دى فالمعالجات بتاعت اللابات مش ال PC بس بتاع ال PC بيبقا فيه منها عليه رموز بتزمر لخاصية معينة زى امكانية كسر السرعة او كده. المهم نرجع للفئات. احنا عندنا حوالي 8 فئات هنقولها من الاضعف للاقوى وهيا كالتالي:

- M: ودى معالجات ثنائية النواة وطبعاً اضعف ما يكون

- U: دى بداية المعالجات اللي شغالة حالياً فاللابات الحديثة، ودى معناها ان الفئة دى للاستخدام المكتبي يعني موفرة للطاقة لكن ادائها مش قوى لكنها شغالة عادى بس اقصد مش اقوى حاجة.

- Q: ودى معالجات رباعية النواة ودى برضه ضعيفة بس احسن من الثنائية.

- P: ودى فئة بتديك توازن بين الاداء واستهلاك الطاقة، يعني حاجة فالنص بين ال U وال H.

- H: دى بداية الفئات القوية وطبعا اللي فيها استهلاك طاقة اكبر.

- HS: دى زى اللي قبلها بس فيها توفير للطاقة شوية.

- HK: دى نفس الفكرة بس في امكانية لكسر السرعة، يعني زيادة السرعة بس ده بيرفع حرارته ويقل عمره الافتراضي.

- HX: وده اعلى واقوى حاجة واكثرهم عدد أنوية.

تمام نروح بقا لل PC ومعنا الرموز اللي هتلاقيها وفالعالب هم 5 وهم كالتالي:

- T: معناها انه بيطلع حرارة قليلة بس اداءه اقل من العادى

- F: معناها انه المعالج مفهوش كارت شاشة مدمج وهنوضح ايه كارت الشاشة ده قدام شوية

- K: وده معناه ان المعالج قابل لكسر السرعة

- X: قابل لكسر السرعة برضه بس هيديك اداء اعلى كمان

- E: ده معناه انه معمول لبعض الانظمة الصناعية زى الشركات غيره

طيب كده خلاص خلصنا كل ما يتعلق ب معالجات اللابات والكمبيوترات. ندخل بقا علي الموبايلات، هنا بقا الوضع بيختلف شوية لأن عندنا شركات كتير وكل شركة بأنظمة التسمية بتاعتها وفي شركات ليها نظام تسمية قديم ونظام حديث برضه.

ف عندنا 3 شركات هنقسمهم 5 فئات بدل 4. وبعد كده 4 شركات هنقسمهم 4 فئات زى اللي قبل كده عادى.

ف نبدأ بالسهل اللي هو 4 فئات ونظام تسمية واحد ودول هما:

- Exynos, Tensor, Kerin, Bionic

الفئات الاقتصادية:

- Exynos: 1500 and less
- Tensor: G2
- Kerin: 810 and above
- Bionic: A13
- Exynos: 1000 and less
- Tensor: G1
- Kerin: 710 and above
- Bionic: A11

الفئات الفلاجشيب:

- Exynos: Above 2000
- Tensor: G4
- Kerin: above 1000
- Bionic: A17 and above
- Exynos: 2000 and less
- Tensor: G3
- Kerin: 910 and above
- Bionic: A15

الفئات العليا:

في بعد كده معالجات من عيلة Helio تباع MediaTek بس دى ليها وضع مختلف شوية لأنه هيا يعتبر الفلاجشيب بتاعها اصلا يعتبر فئة اقتصادية قريبة من المتوسطة ف باقي العائلات بتاعت المعالجات. ف هنسبها فالآخر بعد ما ناخذ باقي معالجات Qualcomm و MediaTek. دلوقتي اتفقنا انه في نظام تسمية قديم وحديث فالنتين دول:

ف خلينا ناخذ الفئة الاقتصادية:

• Qualcomm:

new: Snapdragon 4 gen 1 & above

old: Snapdragon 200 & above

• MediaTek:

new: Dimensity 6020 – 7020

old: Dimensity 700 – 900